

PI RIDIRI

TIRRITORIU

No, chistu non è modu
amicu miu!
E chi facisti,
passasti du' parrinu?
Cu 'stu tirritoriu chi t'attrovi,
sugnu sicuru
chi si cadi a mari,
ni nesci asciuttu
e cu 'n sacchetta i pisci!
Pi quantu è veru! ...
Si m'ammitti 'n'atra vota! ...
Mancu si ti metti a dinucchiuni!
Mancu si frischi 'n giappunisi!
A picciuli cu tua?
M'hannu a cadiri ...
li manu!

A LAMPADINA

A lampadina! socch'è 'na lampadina?

A lampadina è 'na luci c'a lu scuru
s'adduma e fa lustru a tipu suli.
P'addumalla?: Ammacchi u 'nterrutturi.
'Na vota, o' postu 'a lampadina

c'eranu i lumi e c'eranu i cannili.
'O tempu 'i lumi cummattivi c'u petroliu,
c'u micciu, c'u 'ngegnu, cu lu tubbu.
A cannila 'nveci era chiù manisca

e p'addumalla abbastava lu cirinu.
Ma a parti 'a cira, chi squagghiannu
ti la truvavi 'n terra e 'nte vistita,
c'era poi u discursu di lu fumu

chi t'attuppava li naschi tutti pari:
a la matina, quannu ti susivi,
t'attuccava stuppari li canali
a tipu pulizziari lu caminu.

AVI A ESSIRI VISTUTA

A fimmina ...
avi a essiri vistuta.
Si cumpari mezza nuda
nun mi piaci,
mi smunta,
addiventu 'ncunscienti.
No, li causi no,
'un su' pi mia.
La prifirisciu
c'u vistitu tutt'un pezzu
e li buttuna pi longu
'nto davanti;
overu cu gonna e camicetta
(megghiu s'è abbuttunata,
sta 'n'amuri).
Profumu nenti,
avi a essiri sincera:
acqua e sapuni
o acqua sulamenti.
Di 'sta manera,
si lu cori canta,
tra carizzi e paruleddi duci,
la pozzu scuppunari ch'i me' manu
e cogghiri u prufumu da' so' peddi.

U MICCANICU

Avia 'na pumpicedda 'draulica 'nte manu
e la vutava e rivutava cumpiaciutu.

Mi dissì: 'na vota, iu, 'sti sirvizzedda
li facia di notti, doppu lu travagghiu;
avia litiggi 'n casa da me' zita,
anzi, p'a pricisioni, cu so' matri,

pi cui, menu chi stava 'n casa d'idda,
tantu di vadagnatu, a scanzu sciarri.
Vossa nun sapi, pricisa lu picciottu,
c'u me' zitaggiu fu un pocu cuntrastatu;

ma no pi quistioni d'interessi,
simplicementi p'u fattu ch'era curtu.
Essennu chiù vasciu da' me' zita,
a la soggira u zitaggiu nun calava.

Pi cui a la sira, a finuta du' sirvizzu,
chiuttostu di faricci l'orariu,
allintava li retini o' buliu
e m'arattava a 'nvintari quarchi cosa.

E poi, comu finiu? Ci addimannai.
Quannu li dui si vonnu - m'arrispusi,-
pi lu terzu è vanedda chi nun spunta.
Ora, tutti d'accordu, a beddu cori;

c'a soggira, ciatuzzu e cori meu,
puru s'a me' lunghizza è sempri chidda.
'Sta pumpicedda chi vossa ora vidi,
è fora di lu tempu, 'un si fa chiui.

- Picchì, di notti nun travagghi mai?
ci addimannai, pi pungilu 'nto vivu.
- Oramai, rispusi lu picciottu,
'unn 'haiu chiù tempu pi fari 'sti sirvizza;

haiu a me' figghia 'n casa chi ricalma,
e a la sira nun la vogghiu scuntintari;
a parti chi 'na vota maritatu
occhi surisfazioni a' mogghi ci l'ha' dari.

U PIRSUMAGGIU

Anzianottu, accaluratu,
lu cascu 'nta la testa ,
lu nasu pruminenti,
lu cappottu abbuttunatu:
c'un cavuru tantu,
d'accussì cunzatu,
accattava ...
finocchi 'nt'on carrettu!
Taliu, e viu dda allatu,
'na vespa cu lu paraventu.
Suli, cascu, cappottu,
nasu pruminenti, vespa:
puru s'è passatu tantu tempu,
nun si sgarra: è Pippinu lu bidellu!
Chiddu du cappeddu sempri 'n testa!
Ora chi scupriu lu cascu,
pensu,
nun si lu leva chiù,
mancu pi lu lettu!

LI TERMUSIFUNA

Si, certu, li termusifuna
dunanu un caluri tuttu paru:
a casa addiventà un paraddisu
e poi stari 'n cammisa o c'u piggiamà.

Si pensu a lu circu c'u cufuni
a balanza abbucca di 'sta banna!
Però, a 'ddi tempi, pi chiddu chi riordu,
friddu di jornu nun ci n'era:

u friddu si sintia si ti curcavi
quann'arrivava l'ura di lu lettù.
Perciò, a cunti fatti, lu cufuni
era chiù conomicu e abbastava.

LU FASCISTA

Avia quattru seggi di 'mpagghiari
(seggi all'antica, cu corda di curina).
Curina! E' 'na parola! E cu' la fa?!
Mi dicinu d'un tali, versu u Burgu.

Arrivu e addimannu du curdaru.
Attrou 'na cristiana, la mugheri,
chi mi porta avanti lu maritu
ch'è mezzu allitticatu, 'nta 'na seggia.

Quannu lu viu arrestu pircantatu
picchè mi pari chiuttostu murtacinu.
M'addumanna: «Cu' è chi ci lu manna?
Quanta curina vurrissi pi li seggi?»

Poi m'arrispucci: «Forsì nun è cosa»
(fari tanta curina nun s'a senti).
«Haiu statu chiuttostu energicu», mi dici,
«nun pi nenti, a li tempi, era fascista.

Ora, certu, quarchi malannu nun mi manca,
ma, 'nto passatu, haiu statu salutivu'.

‘ E teni ’nsirragghiata la to’ vucca‘
’ntirveni a ’sti paroli la meggheri.

«Tu, salutivu?! Ma a cu’ ci u voi cuntari!
Fascista ... salutivu ... statti mutu!
Sugnu to’ mogghi, e pi quantu m’arrisurta,
tu, di saluti, n’avutu sempri picca!»